

MINISTERIO DE AGRICULTURA, PESCA E ALIMENTACIÓN

16170 *ORDE APA/2973/2004, do 14 de setembro, que modifica para o ano 2004 datas e prazos previstos no Real decreto 543/2004, do 13 de abril, de regulación de determinadas axudas directas comunitarias ao sector lácteo para os anos 2004, 2005 e 2006. («BOE» 224, do 16-9-2004.)*

O Real decreto 543/2004, do 13 de abril, de regulación de determinadas axudas directas comunitarias ao sector lácteo para os anos 2004, 2005 e 2006, establece, no seu artigo 12, que o aboamento das axudas reguladas se realizará a partir do 1 de decembro de cada ano e antes do 30 de xuño do ano seguinte, e sempre que finalizen todos os controis previstos previos á concesión das axudas, axustándose así, canto a prazos, ao establecido no parágrafo 2 do artigo 28 do Regulamento (CE) n. 1782/2003, do 29 de setembro, que establece disposicións comúns aplicables aos réximes de axuda directa no marco da política agrícola común e insta a determinados réximes de axuda aos agricultores.

Non obstante, o Regulamento (CE) n. 1540/2004, da Comisión, do 27 agosto de 2004, que establece unha excepción ao disposto no Regulamento (CE) n. 1782/2003, do Consello, no que respecta ao comezo do período de aboamento de determinados pagamentos, estableceu no artigo 1 que para o ano 2004 o inicio do prazo para o pagamento da prima aos produtores de leite e dos pagamentos adicionais será o 16 de outubro.

O adianto desta data, que non pode ser antes por motivos orzamentarios da Comisión, ten como obxecto facilitarlles aos produtores de leite a xestión da súa situación financeira.

Este sensible adianto da data de pagamento, que favorece o sector lácteo español, obriga a modificar outras datas fixadas no Real decreto 543/2004, co fin de poder adaptar os trámites da xestión da prima a esta modificación, en concreto, a data de establecemento do coeficiente redutor, indicada no número 3 do artigo 5, ben como a data de comunicación do resultado dos controis por parte da autoridade competente da comunidade autónoma ao Ministerio de Agricultura, Pesca e Alimentación, indicada no número 1 b) do artigo 15.

A disposición derradeira terceira do mencionado real decreto faculta o ministro de Agricultura, Pesca e Alimentación para modificar as datas de tramitación, remisión de información e demais recollidas en determinados artigos del.

Polo tanto, a presente orde ten por obxecto dar cumprimento ao establecido no Regulamento (CE) número 1540/2004, mediante o establecemento dunhas datas e prazos de tramitación que garantan un correcto funcionamento das axudas comunitarias no sector do leite e dos produtos lácteos, exclusivamente para o ano 2004.

Na súa elaboración foron consultadas as comunidades autónomas e as entidades representativas dos sectores afectados.

Na súa virtude, dispoño:

Artigo 1. *Modificación da data de fixación do coeficiente redutor para o ano 2004.*

Antes do 30 de setembro, a ministra de Agricultura, Pesca e Alimentación establecerá para o ano 2004 o coeficiente redutor a que se refire o número 3 do artigo 5 do Real decreto 543/2004, do 13 de abril, de regulación de

determinadas axudas directas comunitarias ao sector lácteo para os anos 2004, 2005 e 2006.

Artigo 2. *Modificación do prazo de inicio do pagamento das axudas para o ano 2004.*

A data inicial do prazo para o aboamento no ano 2004 das axudas a que se refire o número 2 do artigo 12 do Real decreto 543/2004, de regulación de determinadas axudas directas comunitarias ao sector lácteo para os anos 2004, 2005 e 2006, fixase no día 16 de outubro de 2004.

Artigo 3. *Modificación da data en que as comunidades autónomas comunicarán o resultado da tramitación e dos controis para o ano 2004.*

A data en que as autoridades competentes lle remitirán ao Ministerio de Agricultura, Pesca e Alimentación a información a que se refire a alínea b) do número 1 do artigo 15 do Real decreto 543/2004, será anterior ao 20 de setembro de 2004.

Disposición derradeira primeira. *Titulo competencial.*

Esta orde dítase ao abeiro do artigo 149.1.13. da Constitución, que lle atribúe ao Estado a competencia exclusiva sobre bases e coordinación da planificación xeral da actividade económica.

Disposición derradeira segunda. *Entrada en vigor.*

Esta orde entrará en vigor o día seguinte ao da súa publicación no «Boletín Oficial del Estado».

Madrid, 14 de setembro de 2004.

ESPINOSA MANGANA

XEFATURA DO ESTADO

16315 *REAL DECRETO LEI 6/2004, do 17 de setembro, polo que se adoptan medidas urxentes para reparar os danos causados polos incendios e inundacións acontecidos nas comunidades autónomas de Aragón, Cataluña, Andalucía, La Rioja, Comunidade Foral de Navarra e Comunidade Valenciana. («BOE» 226, do 18-9-2004, e «BOE» 230, do 23-9-2004.)*

Nos meses de xullo e agosto, e após confluíren unha serie de circunstancias adversas de distinta natureza, producíronse na Comunidade Valenciana e na Comunidade Autónoma de Andalucía uns incendios forestais de excepcional envergadura que, non podendo ser controlados, adquiriron grandes dimensións, coa conseguinte secuela de danos, fundamentalmente sobre masas forestais e explotacións agrícolas e gandeiras, e de risco para a vida das persoas, que obrigaron á evacuación de numerosas poboacións. Así mesmo, víronse afectadas diversas infraestruturas municipais, infraestruturas forestais, camiños rurais, redes secundarias de rega e diferentes tramos de ríos e regatos correspondentes ao dominio público hidráulico.

Así mesmo, durante a primeira quincena do mes de setembro producíronse graves inundacións nas comunidades autónomas de Aragón, Cataluña, La Rioja, Comunidade Foral de Navarra e Comunidade Valenciana que

ocasionaron importantes danos en bens de titularidade pública e privada. Similares consecuencias tiveron tamén as fortes chuvias e inundacións producidas o pasado mes de marzo na provincia de Málaga.

Desgrazadamente, en ambos os casos produciuse perda de vidas humanas.

A magnitude dos feitos e as súas consecuencias obrigan, conforme o principio constitucional de solidariedade e por aplicación dos de equidade e igualdade de trato en relación con situacións precedentes, á actuación dos poderes públicos e á adopción, para as zonas afectadas, dun conxunto de medidas paliativas e reparadoras concordantes coas adoptadas anteriormente en ocasións semellantes, co obxecto de favorecer o restablecemento dos servizos, a reparación dos danos producidos e a volta á normalidade das zonas sinistradas polos incendios e inundacións.

O obxectivo, por tanto, desta norma é aprobar un catálogo de medidas que afecten varios departamentos ministeriais e abranguen aspectos moi diferentes, pois en canto unhas se dirixen a diminuír as cargas tributarias, outras, como a concesión de créditos privilexiados, tentan paliar o impacto nas empresas e particulares afectados.

Por outro lado, as perdas de produción ocasionadas polos citados incendios e inundacións nas masas forestais, nos cultivos e nos territorios afectados configuran, pola magnitude dos danos ocasionados, unha situación equiparable á de desastre natural, nos termos establecidos polas directrices comunitarias sobre axudas estatais ao sector agrario.

Considerando que estas continxencias non teñen cobertura completa no marco do seguro agrario combinado, faise preciso arbitrar medidas paliativas adecuadas, en consonancia coa natureza e incidencia dos danos ocasionados nas producións dos territorios afectados e nas rendas dos agricultores.

Na súa virtude, en uso da autorización contida no artigo 86 da Constitución, por proposta da vicepresidenta primeira do Goberno e ministra da Presidencia, do vicepresidente segundo do Goberno e ministro de Economía e Facenda e dos ministros do Interior, de Fomento, de Traballo e Asuntos Sociais, de Agricultura, Pesca e Alimentación, de Administracións Públicas e de Ambiente e logo de deliberación do Consello de Ministros na súa reunión do día 17 de setembro de 2004,

DISPÓN O:

Artigo 1. *Ámbito de aplicación.*

1. As medidas establecidas neste real decreto lei aplicaranse á reparación dos danos ocasionados polas inundacións producidas en marzo e na primeira quincena do mes de setembro de 2004, e polos incendios acaecidos en xullo e agosto do mesmo ano.

Os termos municipais e núcleos de poboación afectados das comunidades autónomas de Aragón, Cataluña, Andalucía, La Rioja, Comunidade Foral de Navarra e Comunidade Valenciana a que concretamente sexan de aplicación as medidas aludidas determinaranse por orde do ministro do Interior.

2. Para os efectos destas actuacións reparadoras, entenderanse tamén incluídos aqueles outros termos municipais ou núcleos de poboación en que, para a correcta execución das obras necesarias, sexan imprescindibles as actuacións dos departamentos ministeriais competentes.

Artigo 2. *Danos en infraestruturas municipais e rede viaria das deputacións provinciais.*

Aos proxectos que executen as entidades locais nos termos municipais e núcleos de poboación a que se fai referencia no artigo anterior, relativos ás obras de reparación ou restitución de infraestruturas, equipamentos ou instalacións e servizos de titularidade municipal incluídos no artigo 26.1.d) da Lei 7/1985, do 2 de abril, reguladora das bases do réxime local, e á rede viaria das deputacións provinciais, aplicaráselles o trámite de urxencia, e o Estado poderá concederlles unha subvención de até o 50 por cento do seu custo.

Artigo 3. *Danos nas restantes infraestruturas públicas.*

Facúltase os titulares dos departamentos ministeriais competentes por razón da materia para declarar zona de actuación especial as áreas afectadas, co obxecto de que estes departamentos, os seus organismos autónomos e entidades públicas dependentes destes poidan levar a cabo as restauracións que procedan. Para os efectos indicados, decláranse de emerxencia as obras que vaian executar tales departamentos para reparar os danos causados en infraestruturas de titularidade estatal, así como as actuacións destinadas á restauración forestal comprendidas no seu ámbito de competencias.

Artigo 4. *Indemnización de danos en producións agrícolas e gandeiras.*

Serán obxecto de indemnización os danos provocados polos incendios e inundacións nas explotacións agrícolas e gandeiras que, tendo pólizas en vigor amparadas polo plan de seguros agrarios combinados para o ano 2004, sufrisen perdas por danos nas súas producións non cubertos polas liñas de seguros agrarios combinados.

Non obstante, para o caso de producións que nas datas do sinistro non iniciasen o período de contratación do seguro correspondente, tamén poderán percibir as anteriores indemnizacións, sempre e cando se contratase o seguro correspondente a esas producións no exercicio anterior.

Tamén se poderá percibir indemnización polos danos causados en producións non incluídas no vixente plan anual de seguros, excepto que as producións afectadas estivesen garantidas por un seguro non incluído no sistema de seguros agrarios combinados.

Estas indemnizacións irán destinadas aos titulares daquelas explotacións que, estando situadas no ámbito sinalado no artigo 1, sufrisen perdas superiores ao 20 ou ao 30 por cento da produción, segundo se trate ou non de zona desfavorecida, conforme os criterios establecidos pola Unión Europea a este respecto.

Poderán ser obxecto de indemnización nas condicións establecidas neste artigo os danos producidos en explotacións apícolas.

Artigo 5. *Beneficios fiscais.*

1. Concédese a exención das cotas do imposto sobre bens inmoebles correspondentes ao exercicio de 2004 que afecten vivendas, establecementos industriais e mercantís, explotacións agrarias e forestais, locais de traballo e similares, danados como consecuencia directa dos incendios e inundacións, cando se acredite que tanto as persoas como os bens neles situados tivesen que ser obxecto de realoxamento total ou parcial noutras vivendas ou locais diferentes até a reparación dos danos sufridos ou os estragos en colleitas constituían sinistros non cubertos por ningunha fórmula de aseguramento público ou privado.

2. Concédese unha redución no imposto sobre actividades económicas correspondente ao exercicio 2004 ás industrias de calquera natureza, establecementos mercantís e profesionais cuxos locais de negocios ou bens afectos a esa actividade fosen danados como consecuencia directa dos incendios e inundacións, sempre que tivesen que ser obxecto de realoxamento ou se producisen danos que obriguen ao cerramento temporal da actividade. A indicada redución será proporcional ao tempo transcorrido desde o día en que se producise o cesamento da actividade até o seu reinicio en condicións de normalidade, xa sexa nos mesmos locais, xa sexa noutros habilitados para o efecto, sen prexuízo de considerar, cando a gravidade dos danos producidos dea orixe a isto, o suposto de cesamento no exercicio daquela, que producirá efectos desde o día 31 de decembro de 2003.

3. As exencións e reducións de cotas nos tributos sinalados nos números anteriores comprenderán as das recargas legalmente autorizadas sobre eles.

4. Os contribuíntes que, tendo dereito aos beneficios establecidos nos números anteriores, satisfixesen os recibos correspondentes ao dito exercicio fiscal poderán pedir a devolución das cantidades ingresadas.

5. Estarán exentas das taxas da Xefatura Central de Tráfico a tramitación das baixas de vehículos solicitadas como consecuencia dos danos producidos polos incendios e inundacións e a expedición de duplicados de permisos de circulación ou de condución destruídos ou extraviados por tales causas.

6. A diminución de ingresos en tributos locais que os anteriores números deste artigo produzan nos concellos e deputacións provinciais será compensada con cargo aos orzamentos xerais do Estado, de conformidade co establecido no artigo 9 do texto refundido da Lei reguladora de facendas locais, aprobado polo Real decreto lexislativo 2/2004, do 5 de marzo.

7. Estarán exentas do imposto sobre a renda das persoas físicas as axudas excepcionais por danos persoais a que se refire o artigo 9 deste real decreto lei.

Artigo 6. *Reducións fiscais especiais para as actividades agrarias.*

Para as explotacións e actividades agrarias, realizadas nas zonas que determine a orde ministerial que se dite en desenvolvemento do artigo 1 deste real decreto lei, e conforme as previsións contidas no número 4.1 do artigo 35 do Regulamento do imposto sobre a renda das persoas físicas, aprobado polo Real decreto 1775/2004, do 30 de xullo, o Ministerio de Economía e Facenda, á vista do informe do Ministerio de Agricultura, Pesca e Alimentación, poderá autorizar, con carácter excepcional, a redución dos índices de rendemento neto a que se refire a Orde HAC 3313/2003, do 28 de novembro, que desenvolve para o ano 2004 o réxime de estimación obxectiva do imposto sobre a renda das persoas físicas e o réxime especial simplificado do imposto sobre o valor engadido.

Artigo 7. *Medidas laborais e de seguridade social.*

1. Os expedientes de regulación de emprego que teñan a súa causa nos danos producidos polos incendios e inundacións terán a consideración de provenientes dunha situación de forza maior, coas consecuencias que derivan dos artigos 47 e 51 do texto refundido da Lei do Estatuto dos traballadores, aprobado polo Real decreto lexislativo 1/1995, do 24 de marzo. A Tesouraría Xeral da Seguridade Social poderá exonerar o empresario do aboamento das cotas á Seguridade Social no primeiro suposto en canto dure o período de suspensión, manténdose a condición do dito período como efectivamente cotizado polo traballador. Nos casos en que se produza

extinción do contrato, as indemnizacións dos traballadores serán por conta do Fondo de Garantía Salarial, cos límites legalmente establecidos.

Nos expedientes en que se resolva favorablemente a suspensión de contratos ou a redución temporal da xornada de traballo con base en circunstancias excepcionais, a autoridade laboral poderá autorizar que o tempo en que se perciban as prestacións por desemprego, reguladas no título III do texto refundido da Lei xeral da Seguridade Social, aprobado polo Real decreto lexislativo 1/1994, do 20 de xuño, que teñan a súa causa inmediata nos incendios e inundacións, non se compute para efectos de consumir os períodos máximos de percepción establecidos. Igualmente, poderá autorizar que reciban prestacións por desemprego aqueles traballadores incluídos nos ditos expedientes que carezan dos períodos de cotización necesarios para teren dereito a elas.

2. As empresas e os traballadores por conta propia incluídos en calquera réxime da Seguridade Social poderán solicitar e obter, logo de xustificación dos danos sufridos, unha moratoria dun ano sen xuro no pagamento das cotizacións á Seguridade Social correspondentes aos tres meses naturais inmediatamente anteriores á produción do sinistro.

3. Os cotizantes á Seguridade Social que, tendo dereito aos beneficios establecidos nos números anteriores, satisfixesen as cotas correspondentes ás exencións ou á moratoria de que se trate, poderán pedir a devolución das cantidades ingresadas, incluídas cando for caso, as recargas e custas correspondentes. Se o que tiver dereito á devolución for debedor á Seguridade Social por cotas correspondentes a outros períodos, o crédito pola devolución será aplicado ao pagamento de débedas pendentes con aquela na forma que legalmente proceda.

4. Para levar a cabo as obras de reparación dos danos causados, as administracións públicas e as entidades sen ánimo de lucro poderán solicitar do servizo público de emprego competente a adscrición de traballadores perceptores das prestacións por desemprego para traballos de colaboración social, de acordo co disposto no artigo 213.3 do texto refundido da Lei xeral da Seguridade Social, aprobado polo Real decreto lexislativo 1/1994, do 20 de xuño.

Artigo 8. *Réxime de contratación.*

1. Para os efectos establecidos no artigo 72 do texto refundido da Lei de contratos das administracións públicas, aprobado polo Real decreto lexislativo 2/2000, do 16 de xuño, terán a consideración de obras, servizos, adquisicións ou fornecementos de emerxencia os de reparación ou mantemento do servizo de infraestruturas e equipamentos, así como as obras de reposición de bens prexudicados pola catástrofe, calquera que sexa a súa contía.

2. Para eses mesmos efectos, inclúense, en todo caso, entre as infraestruturas as hidráulicas, as forestais, as estradas e, en xeral, calquera que resultase afectada polos incendios e inundacións.

3. Declárase urxente a ocupación dos bens afectados polas expropiacións derivadas da realización das obras a que se refire este artigo, para os efectos establecidos no artigo 52 da Lei do 16 de decembro de 1954, de expropiación forzosa.

4. Na tramitación dos expedientes de contratación non incluídos no artigo 129.2 do texto refundido da Lei de contratos das administracións públicas, aprobado polo Real decreto lexislativo 2/2000, do 16 de xuño, dispensárase do requisito previo de dispoñibilidade de terreos, sen prexuízo de que a súa ocupación efectiva non se faga até a formalización da acta de ocupación.

Artigo 9. *Axudas excepcionais por danos persoais.*

1. Concédense axudas, nos termos que a seguir se dispón, para paliar os danos persoais que teñan a súa causa nas catástrofes a que este real decreto lei se refire.

2. As axudas por danos persoais poderán ser:

a) A cantidade que se concederá en caso de falecemento ascenderá a 18.000 euros por cada persoa falecida. Idéntica cantidade se concederá nos casos de incapacidade absoluta permanente, cando a incapacidade fose causada polos mesmos feitos.

b) Así mesmo, os gastos de hospitalización das persoas afectadas serán aboados sempre e cando non fosen cubertos por ningún sistema público ou privado de asistencia sanitaria.

3. Serán beneficiarios destas axudas a título de vítimas indirectas, no caso de morte e con referencia sempre á data desta, as persoas que reúnan as condicións que se indican a seguir:

a) O cónxuxe do falecido, se non estivese separado legalmente, ou a persoa que estivese convivindo co falecido de forma permanente, con análoga relación de afectividade á de cónxuxe, durante, ao menos, os dous anos anteriores ao momento do falecemento, salvo que tivesen descendencia; neste caso bastará a mera convivencia.

b) Os fillos menores de idade dos falecidos ou das outras persoas a que se refire o parágrafo anterior e os maiores de idade se sufrisen un prexuízo económico-patrimonial relevante, debidamente acreditado, en relación coa súa situación económica anterior á catástrofe.

c) En defecto das persoas mencionadas anteriormente, serán beneficiarios os pais da persoa falecida, no mesmo suposto de prexuízo económico-patrimonial previsto no parágrafo anterior.

d) En defecto das persoas mencionadas nas alíneas a), b) e c), serán beneficiarios os irmáns da persoa falecida se acreditan dependencia económica daquela.

4. De concorreren varios beneficiarios a título de vítimas indirectas, a distribución da cantidade a que ascenda a axuda efectuarase da seguinte forma:

a) A cantidade dividirase en dúas metades. Corresponderá unha ao cónxuxe ou á persoa que estivese convivindo co falecido nos termos da alínea a) do número anterior. Corresponderá a outra metade aos fillos mencionados na alínea b) do número anterior, e distribuirase entre todos eles por partes iguais.

b) De resultaren beneficiarios os pais do falecido, a cantidade a que ascende a axuda repartirase entre eles por partes iguais.

c) De resultaren beneficiarios os irmáns do falecido, a cantidade a que ascende a axuda repartirase entre eles por partes iguais.

5. As solicitudes para a concesión destas axudas presentaranse no termo dun mes, contado a partir da entrada en vigor deste real decreto lei, e serán resoltas polo ministro do Interior no prazo de tres meses.

Artigo 10. *Axudas excepcionais para vivenda.*

1. As axudas polos danos no continente da vivenda soamente se concederán cando estes superen o 20 por cento do seu valor e, en todo caso, terán un límite máximo de 24.000 euros.

2. A valoración dos danos será efectuada polo Consorcio de Compensación de Seguros, e referirase ao valor real do dano efectivamente causado no continente da vivenda, con distinción entre a contía que, se é o caso, correspondese indemnizar ao consorcio consonte a nor-

mativa que regula a súa actividade e a contía que coubese outorgar en concepto de axuda cosonte este real decreto lei.

3. O financiamento específico destas axudas efectuarase nun 50 por cento pola Administración xeral do Estado, e o resto, polas administracións territoriais, segundo os acordos que alcancen entre elas nos convenios que subscriban para o efecto.

Artigo 11. *Réxime especial de aplicación das axudas ordinarias por danos persoais materiais.*

1. Nos casos de axudas previstas nos dous artigos anteriores, non será aplicable o réxime de axudas establecido na Orde do Ministerio do Interior, do 18 de marzo de 1993, modificada parcialmente pola do 30 de xullo de 1996.

2. As axudas que se concedan en aplicación do previsto nos dous artigos anteriores financiaranse con cargo aos créditos 16.01.223A.482, «Para atencións de toda orde motivadas por sinistros, catástrofes ou outros de recoñecida urxencia», e 16.01.223A.782, «Para atencións de toda orde motivadas por sinistros, catástrofes ou outros de recoñecida urxencia», dotados, con carácter de ampliables, no vixente orzamento do Ministerio do Interior.

Artigo 12. *Liñas preferenciais de crédito.*

Instrúese o Instituto de Crédito Oficial (ICO), na súa condición de axencia financeira do Estado, para instrumentar unha liña de préstamos por importe de 20 millóns de euros, que poderá ser ampliada polo Ministerio de Economía e Facenda en función da avaliación dos danos e da demanda conseguinte, utilizando a mediación das entidades financeiras con implantación nas comunidades autónomas afectadas, subscribindo con elas os oportunos convenios de colaboración.

Estas liñas de préstamo, que terán como finalidade financiar a reparación ou reposición de instalacións e equipamentos industriais e mercantís, agrícolas, forestais, gandeiros e de rega, automóviles, motocicletas e ciclomotores de uso particular, vehículos comerciais, maquinaria agrícola e locais de traballo de profesionais que fosen danados como consecuencia dos incendios e inundacións, materializaranse en operacións de préstamo concedidas por esas entidades financeiras, cuxas características serán:

a) Importe máximo: o do dano avaliado pola delegación ou subdelegación do Goberno da provincia correspondente ou, se é o caso, polo Consorcio de Compensación de Seguros, descontado, se é o caso, o importe do crédito que puideren subscribir con cargo a liñas de crédito preferenciais establecidas por iniciativa das comunidades autónomas respectivas.

b) Prazo: o establecido entre as partes, co límite de cinco anos, incluído un de carencia.

c) Xuro: o tipo de cesión polo ICO ás entidades financeiras será do 1,50 por cento TAE, cunha marxe máxima de intermediación para estas do 0,50 por cento. En consecuencia, o tipo final máximo para o prestameiro será do 2,00 por cento TAE.

d) Tramitación: as solicitudes serán presentadas na entidade financeira mediadora, a cal decidirá sobre a concesión do préstamo, sendo ao seu cargo o risco da operación.

e) Vixencia da liña: o prazo para a disposición de fondos terminará o 31 de decembro de 2004.

A instrumentación da liña de préstamos a que se refire este artigo será levada a cabo polo ICO, no exercicio das funcións a que se refire a disposición adicional sexta.dous.2.a) do Real decreto lei 12/1995, do 28 de

decembro, sobre medidas urxentes en materia orzamentaria, tributaria e financeira, e, na súa virtude, o quebranto que para o ICO supoña o diferencial entre o custo de mercado da obtención dos recursos e o tipo antes citado do 1,50 por cento será cuberto con cargo aos orzamentos xerais do Estado.

Artigo 13. *Cooperación coas administracións locais.*

Facúltase o titular do Ministerio de Administracións Públicas para propor o pagamento das subvencións a que se refire o artigo 2, na parte que financia a Administración xeral do Estado, até un importe máximo de 15 millóns de euros, con cargo ao crédito que para estes efectos se habilite, co carácter de incorporable, nos orzamentos do dito departamento. De conformidade co establecido no artigo 50.b) da Lei 47/2003, do 26 de novembro, xeral orzamentaria, o crédito que se habilite financiarase co fondo de continxencia cuxa autorización corresponderá ao Ministerio de Economía e Facenda.

De igual modo, facúltase o titular do Ministerio de Administracións Públicas para establecer o procedemento para a concesión das mencionadas subvencións, así como o seu seguimento e control, no marco da cooperación económica do Estado cos investimentos das entidades locais

Artigo 14. *Comisión interministerial.*

1. Créase unha comisión interministerial para a aplicación das medidas establecidas neste real decreto lei, coordinada pola Dirección Xeral de Protección Civil e Emerxencias e integrada por representantes dos ministerios de Economía e Facenda, do Interior, de Fomento, de Traballo e Asuntos Sociais, de Agricultura, Pesca e Alimentación, da Presidencia, de Administracións Públicas e de Ambiente, así como polos delegados do Goberno nas comunidades autónomas afectadas e por un representante do Consorcio de Compensación de Seguros.

2. O seguimento das medidas previstas neste real decreto lei será levado a cabo pola comisión a que se refire o número anterior, en coordinación coas autoridades das comunidades autónomas afectadas, a través das delegacións do Goberno.

Artigo 15. *Consortio de Compensación de Seguros.*

1. Os delegados do Goberno nas comunidades autónomas afectadas poderán solicitar do Consorcio de Compensación de Seguros, para unha máis correcta avaliación dos danos, as correspondentes valoracións previstas neste real decreto lei sempre que non afecten bens de titularidade pública.

2. O Consorcio de Compensación de Seguros terá dereito ao aboamento por parte da Administración xeral do Estado dos traballos de peritación conforme o baremo de honorarios profesionais que o Consorcio aprobase para os seus peritos taxadores de seguros.

3. Para facilitar a tramitación das axudas e a valoración dos danos, a Administración competente e o Consorcio de Compensación de Seguros poderán transmitirse os datos sobre beneficiarios das axudas e indemnizacións que concedan, as súas contías respectivas e os bens afectados.

Artigo 16. *Convenios con outras administracións públicas.*

A Administración xeral do Estado poderá celebrar coas comunidades autónomas e con outras administracións públicas os convenios de colaboración que exixa a aplicación deste real decreto lei.

Estes convenios terán como obxectivo prioritario a restauración forestal das zonas afectadas polos sinistros.

Disposición adicional primeira. *Competencias das comunidades autónomas afectadas.*

O establecido neste real decreto lei enténdese sen prexuízo das competencias que corresponden ás comunidades autónomas ao abeiro do establecido nos seus estatutos de autonomía.

Disposición adicional segunda. *Límites das axudas.*

O valor das axudas concedidas en aplicación deste real decreto lei, no que a danos materiais se refire, non poderá superar en ningún caso a diferenza entre o valor do dano producido e o importe doutras axudas ou indemnizacións declaradas compatibles ou complementarias que, polos mesmos conceptos, puidesen conceder outros organismos públicos, nacionais ou internacionais, ou correspondesen en virtude da existencia de pólizas de aseguramento.

Disposición adicional terceira. *Créditos orzamentarios.*

A reparación dos danos nos bens de titularidade estatal e nos das comunidades de regantes, así como as indemnizacións que se concedan por danos en producións agrícolas e gandeiras, financiaranse con cargo aos orzamentos dos respectivos departamentos ministeriais, para o cal se realizarán as transferencias de crédito que sexan necesarias, sen que resulten de aplicación as limitacións contidas no artigo 52.a) da Lei 47/2003, do 26 de novembro, xeral orzamentaria, respecto da realización de transferencias de crédito desde operacións de capital a operacións correntes.

Disposición adicional cuarta. *Danos en infraestruturas públicas titularidade de comunidades de regantes.*

Para os efectos previstos no artigo 3, decláranse de emerxencia as obras que execute o Ministerio de Agricultura, Pesca e Alimentación para reparar os danos causados en infraestruturas públicas titularidade das comunidades de regantes, comprendidas no seu ámbito de competencia.

A reparación destes danos financiarase con cargo ao orzamento do Ministerio de Agricultura, Pesca e Alimentación, até un importe máximo de seis millóns de euros.

Disposición adicional quinta. *Anticipos de axudas vinculadas a determinados préstamos para a mellora e modernización de estruturas agrarias.*

Nos termos municipais afectados polos incendios e inundacións, con carácter preferente, poderase efectuar o pagamento anticipado do importe total das axudas de minoración de anualidades de amortización do principal dos préstamos acollidos ao Real decreto 613/2001, do 8 de xuño, para a mellora e modernización das estruturas de produción das explotacións agrarias, daqueles expedientes dos cales se dispoña da correspondente certificación final de cumprimento de compromisos e realización de investimentos.

Disposición derradeira primeira. *Facultades de desenvolvemento.*

O Goberno e os distintos titulares dos departamentos ministeriais, no ámbito das súas competencias, ditarán as

disposicións necesarias e establecerán os prazos para a execución do establecido neste real decreto lei.

Disposición derradeira segunda. *Entrada en vigor.*

Este real decreto lei entrará en vigor o mesmo día da súa publicación no «Boletín Oficial del Estado».

Dado en Madrid o 17 de setembro de 2004.

JUAN CARLOS R.

O presidente do Goberno,
JOSÉ LUIS RODRÍGUEZ ZAPATERO

(Este real decreto lei inclúese tendo en conta a corrección de erros publicada no «Boletín Oficial del Estado» número 230, do 23 de setembro de 2004.)

MINISTERIO DE FOMENTO

16316 REAL DECRETO 1861/2004, do 6 de setembro, sobre as prescricións específicas de estabilidade aplicables aos buques de pasaxe de transbordo rodado. («BOE» 226, do 18-9-2004.)

O Real decreto 1247/1999, do 16 de xullo, sobre regras e normas de seguranza aplicables aos buques de pasaxe que realicen travesías entre portos españois, incorpora ao ordenamento interno español a Directiva 98/18/CE do Consello, do 17 de marzo de 1998, que establece o conxunto de prescricións xerais de estabilidade aplicables a todos os buques de pasaxe, coa finalidade de incrementar a seguranza da vida humana no mar e a protección do ambiente.

A Directiva 2003/25/CE do Parlamento Europeo e do Consello, do 14 de abril de 2003, sobre prescricións específicas de estabilidade aplicables aos buques de pasaxe de transbordo rodado, determina unha serie de medidas de estabilidade adicionais, de aplicación aos citados buques, co fin de aumentar a súa flotabilidade en caso de avaría de colisión e, deste xeito, brindarlles un elevado nivel de seguranza aos pasaxeiros e á tripulación.

O establecemento dunhas normas de seguranza a escala comunitaria pretende, ademais de recoller un marco legal de aplicación uniforme en todos os Estados membros, evitar o falseamento da competencia entre os operadores de buques de pasaxe de transbordo rodado que prestan os seus servizos na Comunidade.

A seguranza dos buques é competencia principal do Estado do pavillón, o que comporta que cada Estado membro deba garantir o cumprimento das prescricións técnicas establecidas. No noso ordenamento xurídico, a Constitución, no artigo 149.1.20.ª, atribúelle ao Estado a competencia exclusiva sobre a mariña mercante, materia cuxo contido está delimitado no artigo 6 da Lei 27/1992, do 24 de novembro, de portos do Estado e da mariña mercante, cuxo número 1.c) inclúe a seguranza da navegación e da vida humana no mar dentro do contido institucional propio da mariña mercante.

Este real decreto, dentro do citado marco competencial, pretende incorporar ao ordenamento xurídico español as prescricións da Directiva 2003/25/CE.

Na súa virtude, por proposta da ministra de Fomento, de acordo co Consello de Estado e logo de deliberación do Consello de Ministros na súa reunión do día 3 de setembro de 2004,

DISPONGO:

Artigo 1. *Obxecto.*

Este real decreto ten como obxecto regular as prescricións específicas de estabilidade aplicables aos buques de pasaxe de transbordo rodado para establecer un nivel uniforme que incrementará a flotabilidade deste tipo de buques en caso de avaría de colisión e brindará un elevado nivel de seguranza aos pasaxeiros e á tripulación.

Artigo 2. *Definicións.*

Para efectos deste real decreto, entenderase por:

a) Buques de pasaxe de transbordo rodado: un buque que transporta máis de 12 pasaxeiros e que conta con espazos de carga de transporte rodado ou ben espazos de categoría especial segundo a definición dada pola regra II-2/3 do Convenio SOLAS, na súa versión modificada.

b) Buque novo: o buque cuxa quilla estea colocada ou que se encontre nunha fase de construción equivalente a partir do 1 de outubro de 2004. Por fase de construción equivalente enténdese aquela en que:

1.º Comeza a construción identificable como propia dun buque concreto, e

2.º Comezou, respecto do buque de que se trate, a montaxe que supoña a utilización de non menos de 50 toneladas do total estimado de material estrutural ou un un por cento do dito total, se este segundo valor é menor.

c) Buque existente: todo buque que non sexa novo.

d) Pasaxeiro: toda persoa que non sexa o capitán ou os membros da tripulación ou outra persoa empregada ou ocupada a bordo do buque en calquera cometido relacionado coas actividades deste, ou que non sexa un neno de idade inferior a 12 meses.

e) Convenios internacionais: o Convenio internacional para a seguranza da vida humana no mar de 1974 (Convenio SOLAS) e o Convenio internacional sobre liñas de carga de 1966, xunto cos protocolos e emendas aos ditos convenios vixentes.

f) Servizo regular: unha serie de travesías efectuadas entre dous ou máis portos por buques de pasaxe de transbordo rodado, xa sexa:

1.º Axustándose a uns horarios públicos, ou

2.º Cun grao de regularidade ou frecuencia que o converten nunha serie sistemática recoñecible.

g) Acordo de Estocolmo: o acordo celebrado en Estocolmo o 28 de febreiro de 1996, en virtude da Resolución 14 da Conferencia SOLAS 95, «Acordos rexionais sobre as prescricións específicas de estabilidade aplicables aos buques de transbordo rodado para pasaxeiros», aprobada o 29 de novembro de 1995.

h) Administración do Estado do pavillón: as autoridades competentes do Estado cuxo pavillón enarboren os buques de pasaxe de transbordo rodado.

i) Estado de acollida: o Estado membro en cuxo territorio se encontran os portos desde ou cara aos cales presta servizo regular un buque de pasaxe de transbordo rodado.

j) Viaxe internacional: toda viaxe por mar desde un porto español a outro que non o sexa, ou viceversa.

k) Prescricións específicas de estabilidade: as prescricións de estabilidade que figuran no anexo I.

l) Altura significativa de onda (hs): a altura media dun terzo das ondas de maior altura observadas durante un período determinado.

m) Francobordo residual (fr): a distancia mínima entre a cuberta con avaría e a liña de flotación final na zona da avaría, sen ter en conta o efecto adicional da auga de mar acumulada na cuberta avariada.